

Liow Ucap Terima Kasih Kepada Najib Atas Pelantikan Wakil MCA Dalam Kabinet Bernama

Jun 25, 2014

KUALA LUMPUR, 25 Jun (Bernama) -- Presiden MCA Datuk Seri Liow Tiong Lai mengucapkan terima kasih kepada Perdana Menteri Datuk Seri Najib Tun Razak atas pelantikan wakil-wakil MCA dalam barisan kabinet bagi membantu dalam usaha pembinaan negara.

Liow berkata, pelantikan ini membuktikan kerajaan Barisan Nasional yang dipimpin Najib sentiasa berusaha mengamalkan perkongsian kuasa bagi memastikan pembangunan negara yang berbilang kaum ini sentiasa dalam keadaan harmoni.

"Saya berterima kasih dan melahirkan penghargaan kepada Perdana Menteri bagi pelantikan baharu menteri dan timbalan menteri dari MCA. Kami akan berusaha melakukan yang terbaik untuk melaksanakan tugas dan berkhidmat kepada negara dan menggerakkan negara ke hadapan," katanya kepada Bernama di sini Rabu.

Liow yang juga anggota Parlimen Bentong berkata selepas meninggalkan kabinet lebih setahun lalu, beliau mendapati banyak perkara yang perlu dilakukan menteri dan timbalan menteri dari MCA untuk membantu perdana menteri.

"MCA perlu meningkatkan usaha untuk mengejar apa yang telah kami tinggalkan, terdapat banyak kerja yang perlu dilakukan dan dengan itu saya menyeru semua menteri dan timbalan menteri dari MCA untuk memberikan yang terbaik bagi menunaikan tanggungjawab kami," katanya.

Sementara itu, naib presiden MCA Datuk Chua Tee Yong yang menyertai semula kabinet sebagai Timbalan Menteri Kewangan berkata beliau akan melakukan yang terbaik untuk memenuhi tanggungjawab yang diamanahkan.

"Sebagai permulaan, saya perlu mendapatkan bimbingan daripada menteri dan timbalan menteri lebih senior mengenai selok-belok kementerian dan dasar yang sedang dilaksanakan," katanya ketika dihubungi Bernama hari ini.

Chua, yang juga bekas Timbalan Menteri Pertanian dan Industri Asas Tani, turut berterima kasih kepada pengundi Labis yang memilihnya sebagai anggota Parlimen

pada pilihan raya umum ke-13 lalu, sekali gus memberi peluang kepadanya menganggotai kabinet.

Menurutnya, pelantikan tiga menteri penuh dan tiga timbalan menteri baharu daripada MCA dan Gerakan yang diumumkan Najib hari ini diharap menjadi jambatan untuk menyuarakan masalah dan pandangan kaum Cina kepada kabinet.

"Kami akan cuba memberi input kepada kabinet dan pastikan dasar yang dilaksanakan kerajaan memberi kebaikan kepada seluruh rakyat.

"Saya juga mengucapkan terima kasih kepada Perdana Menteri atas sokongan dan keyakinan beliau terhadap kedua-dua parti," kata Chua.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1049174>